

Kerweborsch unn Kameradschaft

Omm Sunndaach bin isch gefroochd worrn: Saach emol, Honnes, was issen droo onn de Flerschemer Kerb, dass eiern Johrgong im Joffche Diamantene Kerb gefeiert hott?

Isch saach: Mir hawwe nitt Diamantene Kerb gefeiert, naa, mir hawwe Diamantene Kerweborsch gefeiert. Weil 60 Jahr isses her, 1954 war dess, doo warn mir vumm Johrgong 1935 Kerweborsch gewese, mett Neunzeh. Oo Jahr devor warn merr Vizekerweborsch, awwer oogefonge mett de Vorbereidunge ferr die Vize hawwe merr schunn e Jahr devor.

Mir sinn als Kerweborsch koo Buwe mieh gewese, weil die meisde vunn unserm Johrgong joo schunn mett verrzeh, spätesdens mett fuffzeh in die Lehr gonge sinn unn schunn ausgelernt hadde, vill hadde schunn e bissi Geld im Seggel unn onnern hawwe schunn e paar Mark ferr sisch behalle derrfe, weil se ihr Geld, wasse innere Dutt hoom gebrochd hawwe, de erst emol abgewwe musste, bevor de Vadder odder die Mudder dem Gesell e bissi Daschegeld in die Hond gedriggd hott.

Gefeiert hawwe merr unne im Herrsch, doo hotts doomols owwe noch de grüße Saal unn unne Alt-Flerschem gewwe, all dess, was schunn long abgerisse worrn iss.

Mir Kerweborsch doomols hawwe unser Kerb noch alloons gefeiert, also nitt wie heit mett Vize-Vize unn Exe-Exe, dess hädde mir garnitt zugelosse. Nor onn Noochkerwe-Sunndaach sinn die Vize, also die Kerweborsch vumm nächsde Jahr, debei kumme unn konnde onn dem Daach mett ihrne Fohn hinner uns hermarschiern. Aach enn Beiemoosder als Ehrenkerweborsch odder enn Ehrenkerweparre hotts bei uns nitt gewwe, dess iss erst späder su worrn, irschend ooner hott dess emol erfunne. Kerwemädscher als die Bräut vunn de Kerweborsch hotts bei uns nodierlich gewwe, awwer die dorrfde nor mett uns hinner de Biehn sitze, awwer nitt beim Umzuuch mettmarschiern. Unn ze redde hadde die schunn emol iwverhaupt nix. Die Biehn hadde merr im Saal vumm Herrsch gebaut, enn Himmel bei de Vize unn enn Rosegadde bei de Kerweborsch, alles schee zu, dass merr vunn unne nitt enoi gugge konnt, weil unne iss gedonnsd unn uff de Biehn iss geschmust worrn.

No ja, dess iss halt heit alles onnersd, weil aach su Schulklasse gons onnersders zesommegeetzt sinn. In unserne Klass warn merr 60 Buwe in de Riedschul, in ooner Klass! Die Mädscher vumm Johrgong warn extra unn die warn in de Graweschul.

Doomols in de „Volksschul“, so hott die gehaaße, hott sisch de Kern vunn de Kameradschaft 1935 erausgebild, weil die meisde vunn uns in de Klass sesommegeetzte hawwe unn nor die wenichsde uff e höher Schul, su hott merr sellemols gesaad, gonge sinn. Unn die mussde nooch Meenz odder nooch Risselsem.

Unn su sinn merr heit noch beisomme, mir dun uns aach nitt Johrgong, mir dun uns Kameradschaft nenne. E bissi älter geworn sinn merr, die meisde vunn uns hawwe aach schunn e paar Ersatzdeile im Kobb odder in de Boo, awwer all sinn merr noch gut druff. Unn wenn merr donn allminonner im Joffche gesunge hawwe „Kerweborsch sinn lussdische Brieder ...“ unn ooner gerufe hott „Wem geheerd die Kerb?“, donn hawwe merr all mettgesunge unn mettgerufe, weil die Lieder unn dess, wassmerr doomols uff de Gass unn im Saal gekrische hawwe, dess dun merr im Lewe nitt vergesse. Weil egal wie alt merr werrn, dess Longzeitgedächtnis bleibt uns erhalle.

Honnes, hott doo moin Geescheiwwer gesaad, jetz waaß isch was droo iss onn eierne Kameradschaft. Schad, dass mir koo Kameradschaft unn nor enn Johrgong hawwe.

Eiern Honnes